

## PANXOLIÑA HUMILDE

... No alto da Terra Chá están brillando as estrelas  
xuntas miran de lonxe quen aluma máis ca elas.  
Héspero é a Estrela da Tarde, nós chamámoslle Luceiro.  
Préiades, as sete fillas, todas fan O Setestrela.  
O Carro e As Tres Marías cando apretan a Orión  
miran de lonxe pra Ti, Noso Neno Salvador,  
que naciches entre espiñas relucinte, ¡máis có Sol!

De humilde leito naciches, de humilde berce de pallas.  
Humildes, ...de carne e óso é a condición humana.  
Todos nacemos espidos, ...quen máis, quen menos, tapados.  
Templa trebón pois naceu, a Luz para os máis coitados.  
E acochados nesta orixe que moitos temos a gala  
Meu queridiño, meu sol, nosa prendiña da ialma  
lembraremos a quen veu a este mundo liberarnos.  
Seguimos présos de nós e non podemos soltarnos  
e así cando o xeo roe e os coitelos se nos cravan,  
carambelos tronzadores, nas carnes moles e brandas,  
espetan gumes de ferro perfectamente afiados,  
sen darnos conta que somos fráxiles e limitados.  
E adentrándose na cerna, chegándonos ás entrañas,  
conxélasenos o sangue, o alento e as palabras.  
E, cecais, nos veña á mente que aquí estamos alugados,  
sabendo que a vida é breve e pouco o camiño andado.

Templa trebón pois naceu, a Luz para os máis coitados.  
Naceu e viviu humilde e ós máis humildes pegado  
sen esquecer as raíces, nin escravo da abundancia,  
...lección pra termos presente se ousamos ir á súa casa.  
Desde o berce tomou folgos pra loitar cos marxinados  
anunciándonos o amor por todo o que foi creado.  
Miña prendiña, meu ben, ¡quen o rolo che arrolara!  
es a esperanza que temos -miña xoia, prenda amada-  
nun mañán descoñecido que nos ten tan alarmados,  
soio aluma a túa Luz e con ela, en Ti agardamos.

Do alto ceo baixaron catro anxiños ó Belén  
levan a nova pró mundo e melodías pró recén  
Foron cantarlle ó Neno e, pra que durmira ben,  
botaron unha panxola, que é moi feitiña, abofé.  
A súa mai acaroando, cantaba ela tamén  
dicindo, chea de tenrura: ...ea, ...ea, ...ea, eh.

Nosa Santiña, a súa mai, a calor lle procuraba  
pra durmilo en doces soños mentres máis arrefriaba  
nun leito ruín, de fame, no colo pra adormentalo,  
E seu pai que é carpinteiro, nun pesebre derrubado  
dunha táboas pra un barrelo, fíxolle a cativa cama.  
Que pra aquel que nace pobre todo son portas pechadas.

Quen, nestas noites tan crúas, ¡quen o sono che velara!  
pasando xuntos o frío, soñando na mañán clara.  
É pra che cantar mainiñas cantigas nosas de anaina  
con palabriñas de azucre e na voz propia cantadas,  
en Begonte, hoxe e sempre, verbas galegas da Chaira  
pra che dicir con amor ¡palabras, ...soio palabras!,  
...melodías feiticeiras, muiñeiras e foliadas.

Non temos máis que che dar,  
que estamos cheos de mágoas.  
Bicos mornos, beizos fríos.  
Na túa cara colorada  
pra quen naceu, sendo Deus,  
en cama estrada de pallas.